

27962  
11  
L'HONT E V S E

CHEVTE DV MARQVIS

D'ANCRE, PAR LES

prieres des bons

François.

*Faite ce 24. iour d'Auril 1617.*



A P A R I S,

Chez Iean Berjon, rue Saint Iean de  
Beauuais, au Cheual  
volland.

---

M. DC. XVII.

Acc 88-667 (7)





L'HONTEVSE CHEVTE DV  
Marquis d'Ancre, par les prieres  
des bons François.



*LE Colosse est tombé, qui gardoit le Soleil  
De nous darder ses rais enluminez de gloire:  
Heureux cōmandement, heureux coup nōpareil,  
Qui donnez à mon Roy vne insigne victoire.*

*La sansue a creué plaine de nostre sang,  
Le voleur est pendu, qui volloit la finance,  
Le perfide a senti le fer dedans son flanc,  
Voulant trahir mon Roy & appauvrir la France.*

*Le stranger est puny de sa temerité,  
Le poltron a senti ce qu'est de la vaillance  
Exemple aux suruiuans que mon Roy irrité,  
Punit seuerement vne folle arrogance.*

*La grandeur illicite a veu se terrasser,  
Et par vn vil mespris, d'un chacun mesprisee:  
Estrangers ne venez en France outre-passer  
La volonté d'un Roy, sur toute autre prisee.*

Apprenez au despens d'un Infame orgueilleux ,  
 Qu'il ne faut s'attaquer à ce François Monarque:  
 Qui touche malgré luy ses tresors precieux:  
 Se voit tost annuitté dans le lit de la Parque.

L'esprit d'Ambition qui auoit entrepris,  
 Par force ou par amour, se rendre redoutable,  
 A ce Iuste & grand Roy, iustement est surpris,  
 Et sa mort a monstré sa vie abominable.

Il s'estoit employé a diuiser les cœurs ,  
 Des subiects, du deuoir que l'on doit à son Prince,  
 Aspirant nous trainer au comble des mal'heurs,  
 Il se perd nous sauuant & toute la Prouince.

Partisan des Esprits les plus seditieux,  
 Qui soyent logez la bas dans l'Infernal Tartare,  
 Il auoit esloigné d'un sort Ambitieux,  
 Les Princes de leur Roy par un effaiet Barbare.

Il se vantoit d'auoir & la guerre & la paix  
 A son gré dans ses mains , n'ayant sens ny courage,  
 Qui fuyant des Combats les hazards & le faix:  
 A rencontré la mort en euitant sa rage.

Il n'aymoit rien que soy, & pilloit un chacun:  
 Du mespris il faisoit sa gloire plus seconde,  
 A sa mort il s'est veu execrable au commun,  
 Et l'execration generale du Monde.



*Il auoit attiré des Cœurs François à soy,  
 Déçus du faux semblant d'une vaine esperance,  
 Qui d'un œil desuoillé, seruent ores mon Roy:  
 Ne respirant rien plus que le bon heur de France.*

*De la valeur d'autry, il faisoit sa valeur,  
 Concussion, excès, fournissoient sa largesse,  
 A la fin recogneu, Coyon & sans honneur,  
 On la veu abattu sans gloire sans richesse.*

*Il n'a peu retourner d'où il estoit sorty,  
 Le gibet, le couteau, le feu l'ont en partage,  
 Le Ciel luy reseruoit ce funeste Party,  
 Ayant causé ça bas le meurtre & le pillage.*

*Aydé de son Démon, mal'heureux Imposteur,  
 Il faist serrer un Prince, affin d'estre seul Prince,  
 Cuidant guinder au Ciel une vaine grandeur,  
 Il se perd ne craignant qu'aucun autre le pince.*

*Medisant effronté d'un sinderese atteint,  
 Il dresseoit des gibets, & les noires cachettes,  
 Estoyent plaines de ceux, de qui la voix se plaint,  
 De ses Infames traits, & ses ruses secrettes.*

*Cil qui luy deplaisoit neuitoit point la hart,  
 Où l'Infame couteau, sans nul espoir de grace,  
 Si fort sur l'Injustice il auoit prise part,  
 Que son vouloir tenoit de Iustice la place.*

Aussi tout se fionist, l'air, la terre & les eaus,  
 Le Ciel & les humains, & labregé du monde,  
 Paris, qui preuoyoit les feus & les flambeaus,  
 Desquels il menassoit, embraser terre & onde.

Orgueil & trahison, deffains trop mal'heureux,  
 Abaissez, descouverts, rompus par ce bon Ange  
 Tutelaire à mon Roy, vos execrables vœux  
 Sont tous esuanouis d'une façon estrange.

Ce Cruel va passer Cocite & Phlegeton,  
 Caresser Proserpine en la sale Infernale,  
 Et tachant d'enuahir le Royaume à Pluton,  
 Il ne seduira plus aucune ame Royale.

F I N.

BOSTON PUBLIC LIBRARY



**3 9999 05291 499 9**



